

傲軒胡先生吟藁序

昔仲尼言禮於夏商慨杞宋之無徵嗟夫然有聲者固多傳之天下而其限於知遇者亦宜守之世家此君子所以垂不朽於天壤間也稽古作者可勝計哉焉能一一盡傳耶正考父得商頌十二篇於周及孔子定詩僅存其五聖經猶若此而況其餘耶夫以作者殫心而奕世無聞亦可憫矣予觀傲軒胡公生元季其所制作多豪邁卓絕與虞趙諸公相出入且能不以斗祿汙元命出處大節寔遠過之平生為文不識若干兵燹之餘存者僅此七世孫榮昌令洎川公翻刻以傳曾未幾板漫不可識別裔孫天用復取而讐訂編次刻之胡氏為文



獻世家宜其世守若是也昔之重先德者寶名號之子  
藏曲阜之履兗之戈和之弓垂之竹箭與大壁共  
傳守則斯集也豈直了履竹箭哉三復斯文上以弔胡  
公不朽之志次以嘉天用績業之勤于是乎書此并刻  
之時

嘉靖十四年秋九月既望豫章後學羅慄文烈拜書

傲軒吟藁序

榮昌賢令平江胡公湘潮宗命其子大經持十六世叔  
祖號傲軒字天游者平生所著詩詞一帙來屬為序謂  
祖宗自唐歷宋元世系爵里族譜具悉積累至天游幼  
穎悟七歲能詩文壯而博洽經史將得志適元季搶攘  
遂無宦情養高巖谷惟日吟詠自怡為當時高士此其  
遺藁也予閱之盡帙有古詩有律詩有歌行詞賦焉其  
間態度不一要之皆發乎性情止乎禮義蓋以不過於  
時故襟韻自別雖哀而不傷雖怨而不怒無詖淫邪遁  
之詞率光明正大之氣也夫律詩非古也自風雅止變  
為楚騷再變為魏晉古選歌行訖於唐又變而律詩始

出號近體變斯極矣後世專門作者紛如去古愈遠而  
氣格愈下尚險崛者費雕刻學平淡者流鄙俚求三百  
篇之遺風溫厚和平者亦鮮矣晉詩惟陶謝醇正近體  
唐律惟李杜雄渾拔俗今傲軒先生古詩有晉人風律  
詩有唐人風歌行詞賦有騷人氣骨蓋亦祖陶謝李杜  
而得入戶庭者豈氣運培養世業流傳而然也耶然止  
若干首惟不見其全集竊惟兵燹中流落散失今存者  
什三四耳而其抱負之淵闊經濟之瑰磊即其詩而知  
其人矣使先生遭時展蘊樹功取爵又豈在趙子昂虞  
伯生范德機諸公之下哉嗚呼世之詩家若徒吟風弄  
月流連光景不裨風化雖工無益茲先生之詩誠乎忠  
君愛親仁民愛物之心所發者一性情之自然也為世  
道慮遠矣但恨世久傳訛不無金根謬改雌霓妄呼之  
失今裔孫更研訂而梓行之俾厥祖永慰乎百世之上  
華裔此心不負於百世之下覽斯集者亦必曰某也作  
某也序某也校訂某也編刊遠仰先生高風大義足以  
信今而傳後迨昭朝宗繼述之孝為祖宗家慶之光為  
我朝道德之光且與天地日月同一耿光矣易曰積善  
之家必有余慶斯其一驗也歟

弘治十二年歲次己未菊月吉旦

賜進士出身大中大夫陝西布政司參政前戶科都給

事中蜀內江鄧山繼申序

傲軒吟藁目錄

賜進士第西蜀洪雅李吉校正  
榮昌縣知縣裔孫湄川胡湘刊  
江西南昌後學東灘羅慄重校  
桂林第八世裔孫胡大器編刊

賦

述志賦

五言古詩

聞蛙

白綿巖

寓鐘寶潭書懷

暴雨

鐘寶潭

四老圖

送姪胡文章修江館

有卒

觀蓮

七言古詩

淵明采菊圖

擬賦荆軻館

黃陵廟

贈縫者魏夫

贈黃梅谷

寓鐘寶潭解館

途遇大風

節仲生旦招飲

贈道州齋詔太守

管幼安濯足圖 有引

寓館食齋戲主人

送秋江上人 有引

吟類

楊花吟

田家吟

秋燕吟

鷓兔吟

嘆類

無魚鹽嘆

無牛嘆

無筆嘆

無書嘆

古樂府

故人別

陌上花 有引

長短歌行

和礪詩漁父辭劍引

子胥謝漁父

題陳搏移居圖

張以瞻雲耕

續麗人行次韻

幕阜山

醉呂洞賓畫

修路

給四江韻賦海棠

題窗前松竹自號

長松為風所拔

醉歌行

贈晏道人有引

題吳氏咫尺蓬萊有引

贈吳丈任真

送李德仁巡檢

聞李帥逐寇復州治

青山白雲歌有引

石牛寨

和禽言四首

五言律詩

輓友

有感

七言律詩

贈宗人胡以興號海觀

贈余公天開圖書樓二

燈花給韻

雙頭蓮次韻

牡丹花

寓中水樓秋夕

患瘡二首

寄內兄余牧山

亂後訪舊有感

夏夜閑步

遣悶

偶成

觀除日

慶李千戶納室

寨居千糧吳景祥

憶孟兄季弟

詣石牛寨謁湯元帥

送縣官之京

上知州

上縣尹脫馬夫

譏諷黃蘭谷

贈方道士回沔陽

輓方貴卿

七言絕句

遊法興寺七歲作

橫橋阻水

看畫馬

贈醫士劉碧源

曉日芙蓉

男從軍三首

春詞和韻七首

冬暖

贈星士龍困

寄友五首

自題傲軒八首

女從軍三首

傲軒吟藁目錄

傲軒吟藁

元胡乘龍天游著

賦

述志賦

繫余生之碌碌子承祖考之餘輝方髫年而志學子思  
踵武於前徽丁文運之再昌子期一舉而遂志何中道  
之多艱子終抱志而莫展霜毛颯以垂領子懼五十而  
無聞挾陳編以私淑子庶弗墜於斯文嗟蚩蚩之世俗  
子紛賤目而貴耳顧區區之魯人子尚弗知乎尼父青  
黃眩而莫分子美惡混而相同計微功於呻誦子希速  
化於顛蒙朝卑辭以致幣子夕忘色而忘禮群飛黠而



玉泥子衆口鑠而金毀毛媯靚立而自揚子曾不伸乎  
蹇脩投雙璧以行媒子反效顰之是求謂驂駟為下乘  
子以款段為疾走揖歌采於道周子登砥砢於犀犢般  
紛紛其得志子長裾曳地濟濟而相望俛爭食於鷄鶩  
子仰濶視而揚揚余方索居孑立而無與儔子聊逍遙  
乎林下睇浮雲以舒嘯子倚翠竹而為伍崇丘紛其枳  
棘子時覽德而踟躇哂飢鴟疾盱子攫腐鼠而嚇余龍  
門萃嶽以干雲子亦何往而不我偕彼睨睨之蛙淖子  
夫豈入於我懷何容媚世以窮其道子誠有識之所嗤  
使余為倚市之娼子孰與夫容谷而幽居撫青萍以自  
珍子曰有待夫知己倘千金而非吾徒子寧掛壁而沒  
齒惟聖賢之不遇子亦皇皇而西東矧吾人之數竒子  
敢背道而愠窮躓達觀之無不可子付出處於流坎苟  
素志之靡違子又何傷於乎蹙額正余冠之崔嵬子理  
余瑟之鏗鏘良時詎不可以再得子姑從容而徜徉

五言古詩

聞蛙

鳴蛙出陷井意氣何驕盈乘陰集塔除奪我經誦聲喧  
闐自相和外此無他稱詎諧宮商調虛辱鼓吹名陋哉  
孔稚圭過譽非人情焉知朝陽鳳鏘若韶鈞鳴

暴雨

時聞花馬平章領兵收附蘄水

層雲生遙岑倏忽騰萬馬回颺振高樹少女弄嬌姘蒼

茫乾坤合慘淡精靈下天明亦韜光母乃龍戰野須臾  
萬里霖砮泝動簷瓦端如挽天河千斛罄一瀉潢派走  
街衢陋室漂酸學疾雷無時休壯士為瘖啞書生掩卷  
坐頗媿漂麥者坐憂滔天來浩浩失華屐吁嗟造化力  
妙手誰能假陰氣劃開除萬象了如畫江山若再造社  
鬼爭自詫天公亦何知龍駕正魚雅川源日流血草木  
染腥緒為謝滂沱功一洗氣瀟灑

白綿巖宋叛將劉忠駐兵于此

峭壁削寒鐵古藤嘯飢飈風雲含厚顏幽子方踟躕維  
昔大盜起橫行掠荆湖瞻茲崔嵬顛駐彼梟雄徒豺狼  
據要地麟鳳無全軀腥血被林巒遺金委榛蕪燐光雜  
寶氣永夜猶扶踈聖代開承平崇岡失崎嶇秋風散樵  
牧藹藹桑麻墟靜思天壤間陳迹分賢愚江山一片石  
過者盡漣如奈何千仞青名與鼠輩俱憑高發幽憤胸  
次森戈戾無由出雲雨一洗前朝汙

鐘寶潭

俗傳永寧鄉有寺寺有靈鐘一日雷雨洪

積水太古色臨深思無邪連峰俯澹瀨暗浪鳴谿蒼  
茫蛟龍穴窈窕魚龍家何年萬石靈走此千丈窪傳聞  
蒼山北有寺凌飛霞驚波駕蒲牢白晝誰能遮至今所  
歷地斷石如破瓜年深事既往至寶難披沙平生好古  
意此語信非誇迺知躍冶物豈就世俗搗想像追羸姿  
徘徊大江涯翻然憶泗鼎長嘯驚林鴉

寓鐘寶潭書懷

解劍濯潭水一彈三吟哦寧為猛虎行不作無魚歌高  
堂絕塵囂衿佩羅菁莪時來佳主人慷慨傾懸河斗酒  
出肺肝為君起婆娑丈夫感意氣豈在黃金多

四老圖

吾聞橘中老頗恨愚人摘交幾一幅綃有此四仙跡從  
今固蒂術一秤三尺壁畫夢或驚回耳邊如搏擊

送姪胡文章修江館

我祖文章伯餘光耿未休聖朝崇學校猶子重箕裘  
靈簡三生債臬比幾度秋登高還小魯觀禮復從周琴為  
知音鼓珠寧暗室投小奚藤作笈長鉞蒯為縵細柳牽  
征袂飛花餞去舟嗟予倚市拙壯子異鄉遊白酒春風  
席紅燈夜雨樓生徒交授受賓主迭賡酬章甫儀刑重  
湯盤德業修多能宜下問博學更旁求勿謂青氈冷毋  
貽素食羞句休吟首霜交重擇薰蕕忽忽山川異行行  
歲月邁竹林難共醉江樹攪離愁幕阜山前屋修江月  
上鈎白雲飛暫遠莫惜重回頭

有卒

有卒升我堂手執丈八尺自稱千夫長意氣何粗疎公  
然踞高榻擗色如於菟顧盼旁無人搖頭捋髭鬚時時  
越几席顛倒案上書我欲呵咤去惡聲恐相隨含愠姑  
與言但誇身手麤昨日戰城西殺逐諸賊奴高馬我奪

得丈夫亦知無奮臂好臨陣叫鷲若呼盧袒跣過無禮  
貌狠心弗舒夫子進頑童互鄉亦何誅當其過陽貨唯  
諾無趨趨豺狼正滿野章甫多泥塗區區一介士焉敢  
拒武夫遜辭庶免侮且復忍斯須日暮方出門臨行更  
踟躇

### 觀蓮

清池瑩人心俯見荷葉背南塘非不佳無此青錢蓋沉  
沉古鏡淨濯濯明妝對涼風似留人幽賞心獨會天公  
亦解事一雨不破塊小呼巫陽雲浣此傾國態高盤捧  
跳珠錯落無小大恍疑逢二妃迎咲爭解珮低昂巧簸  
弄明月聚還碎馮夷不相容轉盼何所在人生總虛幻  
佇立增嘆嘅聊為一餉閒了我看花債濂翁不我待誰  
復同此愛長嘯歸去來餘芳滿襟帶

### 夏晝睡起一涼甚快

炎歊困亭午推枕目猶眩簷光射茗椀高壁走驚雷開  
窗山鳥度倚杖松陰轉涼風惠然來林影一時亂徘徊  
入懷袖顛倒弄書卷披襟領嘉貺頓爾掃煩倦迺知封  
姨功百倍班女扇無由均此施獨享醜有面王師正南  
征荷戟汗如濺

### 七言古詩

#### 淵明采菊圖

葛巾翩翩玩秋風元熙有此歸來翁南山荒徑亦何有

黃花迎笑籬之東平生聞道不愠窮冷澹亦與黃花同  
風霜歲晏吾與汝肯遜桃李爭春紅寒香盈把欲誰贈  
繞籬三嗅心冲冲停雲遠在天一方八表慘淡將焉從  
渡江仍孫馬化狗伐荻小兒蛇作龍憂來惆悵清樽空  
解事白衣乃相逢一觴進我忘憂物浩歌目送南飛鴻

擬賦荆軻館

咸陽宮中頭白烏燕丹掩面聲呱呱函關得免豈天意  
禍福倚伏如搏蒲含羞忍恥丈夫事一朝之忿非良圖  
黃金未肯求郭隗白刃顧乃希專諸爾軻見之真不恨  
樊也投首尤無辜悲歌易水豎毛髮胸次似欲無西都  
男兒臨事貴敏速胡迺把袖終踟躕鴻毛性命效一擲  
造物不肯成梟盧悲哉秦人信狼虎事勢固與齊桓殊  
赤刀應有或僥倖矧可生致編其鬚武陽乳臭不足俱  
旁觀駭汗一計無長虹萬丈空貫日恨血竟自灑他裾  
全燕席捲果誰過古今罪狀何紛如子雲弄筆不少惜  
嗟子要亦非庸夫悲風蕭蕭寒日孤空山廢館荒平蕪  
雄姿勁氣不可見仰天椎缶呼嗚嗚

黃陵廟

黃陵祠邊春草齊黃陵廟下春波肥鷓鴣飛飛宮樹綠  
日落未落湘雲低祠中帝子重華妃明妝窈窕如芙蓉  
哀絃五十淚如雨此恨只有江山知飛龍之車無定栖  
乘風倏忽蒼梧西吹簫酌酒心自苦雲屏霞帳歸何時

羞裙嬌小髮誰家兒未識人間生別離輕舟相呼采蓮  
女來看祠前斑竹枝

贈縫者魏夫

元康相業夫何如鄭公故笏今有無風流雲散子孫在  
能事尚與他人殊高軒長戟非所顧并州快剪真吾徒  
廬兒左右亦安有指揮自有金針奴明窗無塵大几淨  
組練拂拭澄江鋪彌縫細意妙熨帖心如兩翁當國初  
青天五色了無迹巧手失笑媧皇踈短長窄狹俱中度  
趁時剪製麗且都要令土木咸文飾豈但擊壤歌唐虞  
噫嗟古道去日遠沐猴被虎何紛如世人重外不重內  
撫掌短褐矜華裾蕭然桑樞一老夫紵布半作桑葉枯  
綺羅千金不足數荷芰落莫秋風孤雲山之陽雲滿谷  
溫其如綿軟如穀攘而懷之可盈掬請君為我裁春服  
舞雩行歌洞庭曲

贈黃梅谷

高人卒歲守窮谷自笑谷中無一物何年招得玉妃魂  
夜半揮鋤種明月蓬萊公鳳不敢窺白雲鎖斷橫斜枝  
水邊籬落豈無地空谷自是佳人居幅中杖藜憩寂莫  
玉顏對坐兩不惡長吟感額亦何傷谷有甘泉梅有萼  
瓊璣漱玉充詩腸歲寒與爾同風霜陽和一返返陰室  
長鋏已在煌煌堂山深谷絕誰為主樵斧伐柯烏啄子  
北風吹面君始歸正恐梅妃有嗔語君家仙人石作羊

山頭石牛臥如牀何如叱起耕雲雨鋤去孤根種禾黍

寓鐘寶潭解館

豫章先生無與儔人中錚錚陳太丘元方敷席季方杖  
照暎左右皆琳瑯清江環門山入樓樓頭書客眼長碧  
無此主人無此客大瓢酌酒勸客留可惜江山有行色  
浩歌一聲天宇白

昔我之來柳依依今我之別山川落葉聲離離停盃撫  
劍不能別此別不飲將何如長魚橫盤尾如帚六龍行  
炙膳夫手我有長歌子有酒男兒快意三百杯何須交  
臂令心哀北風吹人歸去來

途遇大風

客子南遊日欲落觀溪橋頭風色惡砲車雲外天為昏  
走石翻江吹倒人橋頭翁媪邀我宿呼酒張燈傍僮僕  
夜痰撫榻不成眠瑟瑟餘威振茅屋明朝風定天宇白  
一笑促衰三嘆息爾來平地多風波不獨江頭阻風客

羅節仲生旦招飲田家

豫章諸仲如晨星節也落落人中英風塵瀕洞每一見  
令我耳目開聰明涼風吹暑天氣晶桑蓬懸門君始生  
黃公壚頭開瓮自壓酒勸我頻頻傾浮浮瓦缶清復濁  
田翁俯坐酌康爵酒酣起舞為君壽葛天之民無此樂  
浮雲世故未可期有酒不飲將何時人生少壯不行樂  
看我青鬢今成絲三山瑤艸徒聞語碧海蟠桃在何許

相期惟願待清時努力清興門絕祖武

贈道州齋詔太守

大明宮前金作鷄口銜丹書封紫泥使星煌煌出天北  
天路幽險來何遲遲輶車遠駐浯溪澘水畏蛟鼉陸豺  
虎揚君忠義不辭勞匹馬南來布天語上蒼久不聞雷  
霆老夫倚杖雙淚零聖恩惻但有如此嗟爾草木寧無  
情石牛山頭槌畫鼓短衣獨速鸚鵡舞大瓢酌酒勞楊  
君氣如長虹貫玄武揚君殺賊勇有餘十年談笑持旌  
麾腹中落落果何物兵甲之外皆詩書惟鷄一鳴天欲曙  
上馬匆匆不回顧他時薇省問蒼生為說來蘇莫遲暮

題幼安濯足圖

漢末管寧字幼安少與華歆為友山東盜起寧  
避地遼東依公孫瓚三十七年乃歸時魏已受  
禪召拜大中大夫不就時歆已仕魏寧隱居終  
身少嘗與歆鋤地見金揮鋤不顧又嘗割半席  
而坐云歆字子魚

山東豪俊何紛紛飄然乘風呼不聞餘生亦足老遼海  
避世豈必如秦民歸來問舊半零落乾坤割據潛悲辛  
青山未改漢家色焉知不有芒碭雲摩挲兩足共世走  
將來濯波滄浪濱眼中馳驅何足道汗脚三寸曹丕塵  
黃金瓦礫少年事况肯斗祿汗吾身平生子魚今乃爾  
尚恨此耳無由新峩峩白帽千年真安得喚起圖中人



我當再拜公徹洗分我半席長相親

寓館食齋戲主人

蕨芽成團拳筍作竿園松臥壠春告闌寸心生意老猶壯  
鬱鬱競長青琅玕筠籃擷翠風露濕瓦缶釀碧虬龍蟠  
開緘曉試膳夫手寸斷日送先生盤堆金疊玉光璀璨  
未許首啻誇闌干鏗鏘拒齒發鈞奏甘脆適口回儒酸  
填胸一洗鮭鱠惡頓覺肝膽生清寒朱門淳熬腐腸藥  
何異鳩毒生宴安齋鹽送老本吾分一飽已拚如窮韓  
罕無羸羊角踪吾圃祗有蔬糲同盤桓未知餘生消幾筵  
俯仰日月雙跳丸明當更作冰壺傳大笑出門天地寬

送秋江上人

秋江上人錦江鰲峰人也卓錫於吾鄉古天竺  
寺碩德高行闡於禪林與余交最善一日語余  
曰余自弱冠遊昌江去儒為僧迨今四十有八  
載矣風塵瀕洞道途梗塞二親隔絕養生送死  
之道靡有其一雖僧俗異向而酌水思源孰無  
是心今將一歸故里訪桑梓省先人墟墓籲天  
叩佛以盡罔極之勞公能贈以言否余謂釋氏  
之教宗於墨墨尚兼愛治喪以薄而夷子葬其  
親厚何哉且大目犍連為佛弟子拔慈母於冥  
冥之下悲痛展轉亘古所無蓋惻隱之心發乎  
天性者莫不厚於其親非衆人可比豈慧劍之

所能齊也耶吾儒謂仁主於愛而愛莫大於愛  
親余是以嘉秋江之行故於其別也歌以為餞  
冀同志者從而和之其詞曰

上人胸次無纖塵秋江之清堪比倫禪心十載光無際  
相逢一笑皆回春風塵瀕洞猶未已飛錫飄然訪桑梓  
問閭故舊如晨星一時相見應相驚頭顱雖異風度在  
見人尚記兒時名玄關窈窕尊靈隔古栢號寒聽嗚咽  
傾觴布奠了塵緣一片浮雲留不得空山無人龍象悲  
松枝東向歸師還歸昌江水消春水綠此時呼酒臨江湄  
為師一洗白足泥

吟類

楊花吟

吳江春水拍天涯江上風吹楊柳花花飛滿空無處所  
隨風直渡吳江水渡水隨風太有情縈花惹草恣輕盈  
狂如舞蝶穿花徑細逐流鶯度綺城綺城樓閣連天際  
楊花飛入千門去飛去飛來稍覺多紛紛如雪奈君何  
珠簾繡箔淡淡見舞榭妝樓處處過樓中美人春睡起  
愁見楊花思蕩子蕩子飄零去不歸楊花歲歲點春衣  
夢魂不識天涯路願作楊花片片飛

田家吟

村南村北鳴鷓黃舍東舍西開野棠坡晴漸放柔眼綠  
水暖忽報秧芽長老翁躬耕催早起女績男春婦炊黍

犢兒狂走未勝犁蠶蟻半生猶戀紙一春莫笑田家苦  
苦樂原來兩相補君不見踏歌槌鼓肉如山昨日原頭  
祭田祖

秋燕吟別湯元帥館

秋燕別華堂堂淡秋氣涼雕梁三四逸欲別更彷徨喃  
喃細語依簷額自說生來半為客繡戶朱門慣往來青  
郊紫陌多相識十年人事頓堪悲王謝樓臺非昔時骨  
肉凋零毛羽敝一身羞傍小家飛鴉鴉滿眼難為伍好  
風吹落潭潭府陋質深蒙顧盼恩為君強作差池舞南  
塘猶有舊銜泥此日辭君君莫疑願君努力加餐飯明  
年花時復相見

鷓鴣吟

邨原西風動蒹葭淡秋野火如紅霞雪毛老兔誇三穴  
出沒草根何趨捷銀頭飢鷓鴣方貪饕刮翅下搏翻危梢  
鬼子驚奔戰雙股鷓鴣子疾力環三五酒更兔倦鷓亦疲  
二物俱喪還可嗤擅功惟有道傍父鷓蚌兩亡俱付汝

嘆類

無魚鹽嘆

羹無鹽餐無魚吁嗟先生胡不歸無魚何以充口腹無  
鹽何以滋肌膚太學韓公嘆寂寞朝齋暮鹽猶有餘馮  
驩彈鋏歌未已素鱗坐見來行厨奈何淡泊兩無有坐  
啣蠹簡形容枯先生撫掌付一笑書中有味甘如腴人

生飢飽皆夢幻風俗況與承平殊憶昔閭閻正殷富所  
鮮煮海誇荆吳巨商滿載出都會萬船銜尾如鷺鳧和  
羹飼犬土同價物理盛極逢乘除風塵瀕洞商賈絕千  
錢所得纔錙銖由來事勢本無據變化反復如桴蒲先  
生謀道不謀食疏飯飲水真良圖

無牛嘆

荒疇萬頃連坎阡躬耕無牛將奈何老翁佷佷挾良耜  
婦子並肩如索駝肩頰骨忘汗淹肘竟日勞勞不終畝  
夜歸草屋吟酸嘶祇有飢腸作牛吼却憶向來全盛年  
萬牛蔽野無閑田干戈瀕洞一掃盡齧齧就死誰能憐  
桃林荒塘春草綠根底紛紛何有犢老翁無力待昇平  
臥看牽牛向天哭

無筆嘆

宣城鼠鬚不可索越南鷄毛不可得山中老穎飛上天  
九館癡髯化為石晴窗無復禿千枝曉夢有時來五色  
一庭老葉掃西風袖手空堦看蝸迹

無書嘆

六經既降諸子出後代枝葉何其多眼中萬卷忽如掃  
無乃天意憎繁苛陳言故紙本糟粕吾道耿耿終難磨  
劫火不赅孝先笥畫臥坦腹時摩挲

古樂府

故人別

故人別新人歸大車小車當路衢路傍把酒相迎送盡  
道新人貌更殊故人含笑催上道回頭却向新人笑黃  
金不鑄玉卽心送故迎新何日了故人一去無回期新  
人還著故人衣玉卽逸林看畫眉恰似故人初到時

### 陌上花

梁元帝妃每歲春月渡江歸寧帝作書報妃曰  
陌上花開可緩緩歸矣後人遂作樂府名陌上  
花因擬賦之

陌上花開滿陌金屋美人歸未得流蘇繡帳掩香塵目  
斷君王片雲隔九重宴罷移宮燭歌管聲殘更漏促自  
臨寶榻拂鸞牋細字斜行寫心曲陌上花開滿枝掌中  
美人知不知翠眉蟬髻今何似趁取花時緩緩歸書中  
未盡叮嚀語意更遣青鸞口傳語陌上花年年好掌中  
人年年老春光爛熳不歸來轉眼殘紅滿芳艸一封書  
千萬囑油碧壁車黃金犢花邊待花底宿緩緩歸莫愆  
期

### 長短歌行

#### 次和礪詩漁父辭劍引

江有阻子路有岐時將迫子來何遲子弗渡子我心悲  
既渡子子我何以劍為噫嗟行子子無我疑

#### 子胥謝漁父

江有水湯湯我將濟子無梁窮途事迫子心皇皇傲丈

夫兮孰舟孰航丈人之德兮非劍何償胡為不顧兮迺  
鼓柁乎滄浪噫銜恩誓報兮之死靡忘

題博陳移居圖

尊拳相交四海沸吁嗟先生不安睡翻然舍此何復之  
歲晏天寒日云暮幼妻弱子並兩健老減反顧催著鞭  
酒尊棋局相後先犬豕在道猫在肩先生之居白雲裡  
清風迎門鶴隨處陳橋一旦擁黃袍何似山中睡方起  
石田茅屋今安在回首高風三百載君不見古汴淒涼  
禾黍秋向來功業水東流

題張以瞻雲耕

山磷磷石鑿鑿山石之間雲漠漠短衣開雲種寂寞良  
耜爰爰翻犂确雲淡不辨人與牛但聞揮鞭叱咤牛礪  
角旁人借問耕者誰晉侯之孫勃宰兒讀書不食萬鍾  
祿却來雲裡親鋤犁雲山地瘦禾黍薄噫嘻嗟先生此  
東作一犁春雨土如酥共笑耕雲計良惡耕雲不惡亦  
不癡先生笑君君不知人間寸地出租賦力田不給公  
家需不如耕雲之樂有深趣縣遠山深無悍吏君不見  
田家催租夜打門先生作勞方臥雲

續麗人行次韻

春江水綠春草長暖風晴麥搖翠光江頭女兒踏春陽  
宮鞋蹀躞雙鴛鴦濃蛾掃翠誇時妝青梅如豆懸釵梁  
含羞避客依垂楊綠條花貌相掩映羅裙颯颯風送香

我欲臨流攬其裳贈君江南充耳之明璫願君回盻流  
波雙餞君東風南浦之離章微辭謔浪空彷徨彤霞無  
影散巫峽飄然竟學孤鸞翔亦知佳人禮自防豈比濮  
上桑間倡行雲一去杳莫覩痴心空斷相思腸

### 幕阜山

幕阜山高一千八百丈我疑山頭即天上捫蘿躡磴到  
山巔又如平地望青天始知天高百萬應無極幕阜蒼  
蒼一拳石洞庭八千古所傳對此遙看如鏡圓若還更  
上三萬丈那知天下有山川

### 醉呂洞賓畫

碧眼朦朧風鬚獵獵一朵仙花紅襯頰瑤池宴罷九霞  
漿人世已非唐日月飈輪倚醉風泠泠玉山恨不扶飛  
瓊城南老魅爾何物捉臂返顧如叮嚀岩也睨之若螟  
蛉拉乾坤之隘兮不足供先生之高枕盃洞庭之綠兮  
不足助先生之解醒噫今夜酒醒何處清風明月一笛

### 瑤京

### 脩路

羊腸一徑依山度磴确磔幾千步使君有命催行程  
里胥傳呼捉鄉丁填坑伐塹如雲集編木為橋石為級  
忽然堂堂成坦途無復當時九折危王陽阮籍應無滯  
來牛去馬皆沾惠君不見太行之路車可摧蜀道之險  
尤崔嵬安能剗除俱坦坦王道在德不在險

給四江韻賦海棠

街西街東鼓逢逢書生閉門續蘭缸有美一人嬌不  
夜稱唐妃領群姬敲門索我南園百尺之飛幢恍然失  
之神為懽逸庭如聞足音疑有花嫣然來錦江炯如真  
珠滴春缸又如錦旅搖長杠朱唇半啓調新腔醜顏睡  
足琉璃窗天然富貴真一笑未了千花降麝桃俗李徒  
紛厖正須林下拜老龐惜哉胡不居空磴傾城倚市衆  
所矐世人共辨珉與玳平章比擬言何哢陋儒抱恨駮  
且憊乃以目孔求他邦我來咨嗟久降躩對花壓酒如  
流淙玉壺錦瑟聲鏘鏘興酣弄筆鼎可扛賞音一洗陵  
翁哢詩成絕倒付同調為我金石相春撞

題窓前松竹因自號松竹主人

王官鱗鱗多士振振主人開窗如見大賓有琴無絃歌  
以娛客清風徐來如和金石停歌推琴請為客歲母爽  
爾節母虛迺心客謝主人勿翦勿伐同堅歲寒誓保霜  
雪

長松為風所折

夜來顛風何太雄吹折老夫屋後之長松長松吹折猶  
自可有鵲養子巢其中巢傾子死鵲飛去哀鳴磬磬繞  
他樹向來自謂安如山今日方知致身歿嗚呼長松尚  
有吹折時草藏之禽尤可嗤

醉歌行



醉中豪氣如長虹走上高樓叫天公問天開闢今幾年  
有此日月何因緣月者陰之魄日者陽之精陰陽果何  
物產此團團形一如白玉盤一似黃金鉅得非冶鑄出  
無乃磨琢成茫茫太古初二氣才胚胎金烏從何出玉  
兔從何來扶桑誰人種桂樹何年栽東升何所自西沒  
何從遊胡為天地間奔走不暫休但見朝朝暮暮無定  
輒但見波汲汲如奔郵催得黃童變白叟催得華屋  
成荒坵催得秦皇漢武忽坯土催得黃河碧海無纖流  
我有如渾酒勸天飲一石願天挽長繩繫此烏兔翼一  
懸天之南一掛天之北安然不動照萬國無冬無夏無  
旦夕百年三萬六千作一刻畫使世人老不得

贈晏道人

長壽晏道人自號阜雲嘗賣藥遊江湖有道術  
能致雷雨歲旱州官命禱雨有應一日以畫龍  
半軸徵予語因賦長句云

幕阜何巍峩連雲亦巖從兩山蒼蒼知幾重下有百尺  
潭上有千仞峰中有道人炯炯懸雙瞳道人有道超凡  
庸結廬何年依喬松赤手捕得潭中龍撫而養之如守  
宮一瓢寒淥銀溶溶往往為人作年豐有時

題吳氏咫尺蓬萊

吳志道即居左鑿池中立石假山高丈餘絡以翠蘿環以清流旁創小亭為遊息之所肩吾陳子扁之曰咫尺蓬萊作歌要予同賦因次其韻云

吾聞蓬萊之山三萬里盤根下插歸虛底六龍顛顛挽不前那得飛來窗戶裡寒姿顛倒白雲間綠水錯磨花玉齒老苔懸薜荔聯絡鬢髮玄洲環島嶼因知幻戲出人為豈有金珠隱空翠亭中老仙方晏坐醉眼狂花吐奇語省來一笑悟非真欲借鯨波洗眸子世間小大本無憑一視政須齊彼此秋毫秦岱孰雌雄滄海坳堂同一水嗚呼安能自此乘清風下視塵寰渺何許

贈吳丈任真

王述掇皮皆是真知者惟謝公一人當時審其意不顯肯獨表表超出群吳君大書任真扁其右觀者駭愕來云云方今舉世皆詐偽一真豈獨能久存粵雪蜀日衆

所吠皎皎千丈不如尺水渾紀信以詐全萬乘宗慙以偽能  
回軍輕言對朋友九疑對面生層雲是真無用於國亦  
無用於人公如好真不自休只合逍遙之墟作采真之  
游否則吾不見汝封侯

送李德仁任初陽和平巡檢

錦襜窄袖青蒙茸千金駿馬飛如龍零陵候使催上馬  
別酒一笑千觴空流星白羽新月弓氣如秋旻吐晴虹  
掛弓插箭出門去白面已作嗔人紅旁人借問將軍誰  
乃祖向來猿臂公此行為問向何許永州之野浯溪東  
浯溪有寨圍千峰將軍雄飛鎮其中從來文事有武備  
欲與利器加磨礪往歲絃歌動隣邑三年化雨沾頑童  
東安父老舊相識但怪章甫成軍容曾聞零陵古佳縣  
山川清曠無邊烽寨前花開春酒熟細柳夾道青濛濛  
胡床夜琴山月午夜騎突出蠻煙濃鳴弦忽作餞鷓鴣  
馬頭迸落雙鴻飛健兒提酒酌大斗短角細吹梅花笛  
封疆無虞王事少此樂孰與將軍同君不見壺頭六月  
火雲熱大將執掌親從戎將軍官閒貴憂國搔谷正賴  
懷柔功方今天子重邊徼選擢勇銳無卑崇男兒努力  
樹明德談笑自可求殊封長風吹吹送枯蓬行塵目斷  
心無窮他年得意馬蹄疾錦衣歸拜明光宮

聞李帥逐寇復州治

西南佳氣清如水一騎星馳傳好語隴西將軍天下奇

夜半殺賊收城池我城周遭賊壘將軍飛入儲胥裡  
城中妖血渺長衢帳底渠魁睡猶美將軍掩襲信有功  
人物自是南州雄惜哉士卒多苦暴弱肉強食鷓鴣同  
君不見往昔經過清戎野老稚逢之無脫者至今婦女  
墮戎行閭里蕭條泣鰥寡嗚呼賊退將軍留老夫憂虞  
猶未休

### 青山白雲歌

思余嘉賓也風塵瀕洞南北不通音問隔絕思  
而作之嘉賓毋夢吞雲而生小名雲孫嘉賓翰  
林院判

青山之青無可名有山以來無比青白雲之白白如羽  
倏忽變化騰青冥我本青山人結廬白雲間白雲長往  
來青山淡無言朝同白雲出暮共白雲還白雲一旦舍  
我去惟有青山相對閑人言白雲好我愛青山佳青山  
何所有綠水泛桃花白雲何所之金銀宮闕天之涯浮  
沉異世如塵泥我思白雲雲不思洒掃青山石高歌白  
雲詩黃塵吹空暗江海我但醉眠聞鼓輦願隨長風一  
息九千里喚取白雲還故廬青山青山堪采芝白雲白  
雲胡不歸商家霖雨久寂寞臥龍不起疇其依瑤姬老  
矣高臺非雲子雲子知不知浮雲萬變果何益不如溪  
山抱石而幽栖噫嗟歸來子帝鄉雖好不可以久居

### 石牛寨

癡牛偃蹇不服廂天風吹落千仞岡明河在望歸不得  
化作山頭一拳石皮毛剝落封苔錢千古萬古眠雲煙  
嗚呼安得秦鞭起穀蘇短衣歸種汶陽田

和禽言

泥滑滑

泥滑滑十步稜掙五步蹶我行欲借東家驢一蹶翻然  
四蹄折嗚呼寧可徒行費脚力驢死家貧償不得

提葫蘆

提葫蘆徧走街頭無酒壚田家米價貴如玉斗酒十千  
無處酤嗚呼客來一笑茶當酒邇來風塵茶亦少

婆餅焦

婆餅焦新婦腰鎌孫荷樵原頭麥熟空滿壠丈夫盡赴  
征西徭嗚呼土鐺敲火淚如雨婆餅不焦心自苦

歸去樂

歸去樂蜀道崔嵬天一角青泥百折費躋攀灑灑翻空  
波浪惡嗚呼朝避長蛇夕猛虎干戈滿眼歸何所

五言律詩

輓友

壯年猶綠鬢大夢忽黃梁白骨隨歸棹清魂寄異鄉孤  
鸞空弔影雙雁又分行獨洒梅花淚臨風奠一觴

有感

老髻若霜蓬如何獨守窮還家猶作客廢學願為農日

月龍蛇雨山川虎豹風床頭新釀熟思與故人同

七言律詩

贈宗人胡以興號海觀以興名鎮

何年鼓棹泛鴻濛畫捲蓬瀛入望中老蜃噴空開翠巘  
巨鰲吹浪濕珠宮天浮析木星河外地盡扶桑日本東  
說與井蛙應不信更攜銀漢附鵬風

贈余公圖畫樓

一幅生綃天畫頭水光山色上簾鉤似將崔白千年軸  
挂在元龍百尺樓霜葉掃空描落照濕雲和雁捲清秋  
紛紛紙上爭妍醜還識無為妙處求  
高人有眼看山川不費從來買畫錢萬古丹青垂宇宙  
百川樓觀倚風煙人行樹葉林邊路鳥沒蘆花影裡天  
我欲與公添一筆寒灘蓑笠釣魚船

燈花給韻

寸燼能偷造化權花開花落自黃昏豈憑根本栽培力  
暫借膏油養育恩隔幔乍疑籠日幄展屏聊當避風幡  
凋零滿案無人問付與青娥淬鬢痕

雙頭蓮

一枝瑤柄倚風清兩面紅妝鬪日明張孔斷魂埋玉并  
尹邢妖魄寄金莖雙鸞俯鏡東西照百子分房向背榮  
若使此花還解語好將蘭臭與誰平

牡丹花

相逢盡道看花歸，漸愧尋芳獨後時。  
北海已傾新釀酒，東風猶鑠半開枝。  
掃空紅紫真無敵，看到雲仍未可知。  
但願倚闌人不老，為公長賦謫仙詩。

寓中水樓秋夕

殘暑崢嶸入夜平，羈懷牢落傍秋生。  
斷雲推月弔孤影，高瀨挾風來遠聲。  
山店辟纒松火細，水樓欹枕葛衣清。  
餘年飽食慚踈放，回首南州欲用兵。

患瘡

陽消陰長巧知時，夕去朝來似有期。  
初若抱冰增戰慄，終如坐甑劇蒸炊。  
閨中郭索不我借，句裡髑髏空自竒。  
擬倩馮夷顛項為令，驅寧馨兒。

衰病伶仃一老夫，桃笙六尺傲朝晡。  
天公有意存吾道，瘡鬼無知害老軀。  
肝膽輪囷猶顧我，形容枯槁似非吾。  
有時怒見不平事，強起挑燈看湛盧。

寄內兄余牧山名

字和仲

少年親故盡豪英，回首家山一愴情。  
桑梓連雲俱寂寞，松筠鬪雪獨崢嶸。  
生憎赤憤何時白，須信黃河有日清。  
珍重加餐莫輕出，共留老眼看昇平。

亂後訪舊有感

粉牆朱戶舊婆娑，今日重來滿綠莎。  
戀戀綈袍知己少，紛紛紈袴少年多。  
看燈淡巷思行樂，呼酒長亭憶醉歌。  
惟有河南橋下水，儒冠依舊照嵯峨。

夏夜閑步

野色寥寥一犬鳴  
戍樓初鼓絕人行  
哭聲未斷歌聲起  
漁火將殘鬼火明  
月暗荒村愁有虎  
煙迷行樹看如兵  
羈懷世故千憂集  
竟夕徬徨睡未成

遣悶

昏昏如醉復如癡  
半榻殘書兩鬢絲  
世故擾攘思樂日  
暮年艱苦憶兒時  
對人言語惟稱好  
徇俗文章懶出奇  
斗酒十千無覓處  
悶來消遣只憑詩

偶成

鄭虔官冷飯不足  
杜陵高歌勸歸來  
古人失意有如此  
嗟我不去胡為哉  
山中屋廬殊未破  
門前稻秫已堪栽  
扶犁有子健如犢  
不信石田荒綠苔

觀除日

君王輕爵重艱危  
欲把銅山鑄虎符  
天上故人脩詔草  
山中幽子看除書  
軒裳袞袞爭先進  
肉食紛紛媿遠圖  
戡亂扶顛今日事  
不知廉蔣果何如

慶李千戶納室

轅門佳氣曉氤氳  
感粟筵開酒半醺  
鸞扇低回人似玉  
虎牙顛倒從如雲  
花開穠李春猶小  
帳掩流蘇夜正分  
從此談兵應有助  
木蘭元是女將軍

寨居千糧吳景祥

甌有塵埃釜有蛛  
匡圍未解意何如  
西山紫巖和雲采



南谷黃精帶雨鋤門外更無千斛米腹中空有五車書  
吳江見說淡如海何惜餘波活鮒魚

憶孟兄季弟

兄弟相看各一方別來俱各鬢成霜江山千里猶比屋  
風雨幾番能對床海燕年淡長作客塞鴻天遠不成行  
擎杯莫負黃花約來看南塘萬竹長

詣石牛寨謁湯元帥

函谷門開隼脫鞬獨攜霜骨傲窮秋故無六祖三間屋  
羞上元龍百尺樓老褚獨憐勝翠被布衣猶待解貂裘  
明朝擬訪林邊竹還許吟螺借我否

送縣丞之京

五鼓船開不可攀金門報政幾時還半帆花雨征裳重  
滿院松風午夢閒名字竟通青瑣闥恩榮暫造紫宸班  
重來擬望蘇民瘼倚杖江頭聽珮環

上知州

紫氣迢迢下玉京天教五馬鎮山城一輪明月何曾缺  
百里昌江無此清草木回顏沾德澤豺狼側耳避威名  
山中病叟頭如雪願借餘光一照榮

上尹縣

聖主恩深及草萊侍丁特許免科差天邊鳳詔今重見  
江上馬夫猶未回八十蒼顏憐我老一雙青眼望公開  
倘能替換扶衰病結草丹心死不灰

譏諷黃蘭谷

雨花風絮兩飄飄，興味都非舊寂寥。  
白足懶穿雲外履，翠眉低按月中簫。  
重拈曉鏡添新髮，旋試春衫減舊腰。  
金鎖玉函千載恨，爭如雲雨似朝朝。

贈方道士回沔陽

天上神仙白玉畿，山中道士紫煙衣。  
風塵瀕洞雙鳧去，城郭荒涼一雀歸。  
碧海青桑談世故，丹田火棗悟玄機。  
明朝又向江頭別，回首空山葉正飛。

輓方貴卿

河南橋下舊英雄，半百年華一夢中。  
五夜忽聞呼啓啓，九原堪恨去匆匆。  
孤鸞吊影菱花掩，怨鶴無聲蕙帳空。  
斧鉞朱殷今日事，埋香有地不如公。

七言絕句

遊法海寺興七歲作

山色搖光入袖涼，松陰十丈印迴廊。  
老僧讀罷楞嚴呪，一殿神風栢子香。

春詞和韻

綠牕紅燭製春衣，宮樣花紗要入時。  
玉手怕裁雙鳳破，并刀欲下更遲遲。  
日射珠簾試曉晴，隙光斜上寶釵明。  
碧紗窗下無消息，閑數吳蠶幾箇生。

自尋蜀紙寫吳歌，小字斜行未省多。  
嬌懶却嫌春戰冷，

手拈牙筆倩人呵

暖風深巷賣花天  
爭買繁花裊髻邊  
揀得一枝紅躑躅  
隔簾拋與沈郎錢

雙鴛不惜泥泥沙  
閒逐吳姬鬪草芽  
贏得阿嬌金半臂  
背人含花入桃花

貪逐春風趁伴遊  
不知明月上梢頭  
兒夫若問歸遲意  
幾度穿花避紫騮

昨日江頭看綠楊  
歸來學得兩眉長  
低聲更向蕭郎問  
又恐眉長不稱妝

橫橋阻水

浮江積雨水連天  
楊柳依依一釣船  
白髮篙師多意氣

向人先索渡江錢

冬暖

冬令偷春多得暖  
灞橋無思可吟詩  
江梅一樹都開遍  
不問南枝與北枝

看畫馬

九重天上看飛龍  
大地驂騮一掃空  
白髮塞翁多意氣  
眼明空見畫圖中

贈星士龍困

涵空一碧湛虛明  
中有蜿蜒睡未醒  
好待夜深風浪息  
看渠吞吐一天星

贈醫士劉碧源

老去劉郎鬢未華  
枕中鴻寶鼎中砂  
仙源十里蒸霞色  
半是桃花半杏花

寄友

憶子自昔乘羊車  
數月不見今何如  
潭邊日日看流水  
恐有沂流雙鯉魚

均家竹好別來久  
有客解道今平安  
最憶窓西萬竿綠  
幾番清影上儒冠

河南橋頭舊酒壚  
酒邊曾共歌烏烏  
高樓百尺應頻上  
還有詩人共醉無

謝家莊上分攜日  
一曲驪歌醉裡聽  
惆悵芳卿夢中意  
人間無路寄叮嚀

傳聞借得溪頭屋  
堆麩如山不計車  
何日相逢一尊酒  
板橋踏月夜還家

曉日芙蓉

也傍清池也傍籬  
醉紅嬌嫩曉尤奇  
晴光却是多私意  
偏照池邊帶露枝

壬辰歲草昧逢蟄起  
比屋皆煨燼區室幸存自扁曰  
傲軒因題八首

柴門竟日無車馬  
芳草沿階一徑荒  
珍重祝融隨世態  
煌煌不到汝陰鄉

百屋堆錢等夢回  
春風多悞燕歸來  
如何四壁都無物  
獨向人間傲劫灰

松竹陰陰綠四圍可憐天亦慶吾廬  
床頭兔冊依然在  
不讀獨秦人種樹書

喪亂離群一老夫悲歌誰與和  
烏烏柴門晝日不難閉  
俗客如今亦已無

風塵頑洞靈光在煨燼蕭條魯殿存  
事有至難今兩得  
傲軒猶我我猶軒

獨酌何須問主賓興來魚鳥亦相親  
蒼松翠竹真佳客  
明月清風是故人

避世誰能好采芝山溪谷絕路逶迤  
南塘只在人間世  
滿眼干戈似不知

武陵桃花落紅雨邵平瓜圃生秋風  
不及南塘松與竹  
青青長對主人翁

### 男從軍

十五束髮去從軍背劍腰刀別弟兄  
昆男兒不洒臨歧淚  
感粟數聲吹出門

雨沐風餐夜枕戈東征未了北防河  
當時只道從軍樂  
誰道從軍苦更多

自古男兒要自強腰間金印有時黃  
時來不用龍泉劍  
手搏樓蘭獻廟堂

### 女從軍

二八女兒紅繡靴朝朝馬上畫雙蛾  
采蓮曲調都忘却  
學得軍中唱凱歌

從軍裘束効男兒短製衣衫淡掃眉衆裡倩人扶上馬  
嬌羞不似在家時  
柳營清曉促征期女伴相呼看祭旗壯士指僵霜氣重  
將軍莫訝鼓聲催

傲軒吟藁終

元逸民胡天游傳

明邑人阜野艾科晉卿甫撰

先民胡天游者楚平江人也名乘龍號松竹主人以字  
顯故今亦惟曰胡天游云天游生元季有俊逸才天稟  
迥邁甫七歲齡即豪游名剝短吟一絕殊咄咄有作者  
風力角尚壯業已氣吞曹劉鋒犯沈謝真葩雅之流亞  
而騷墨之宗工也遂名籍籍震一世咸竒天游視其名  
流伯生子昂不輸一籌樽俎輦可衙官之矣必躋聯仕  
顯鴻名卒志于鍾鼎竹帛以已也而天游則又負高氣  
孤立峻視曾不一振臂起取斗祿以汙戎狄冠裳中也  
斯志也不亦竒崛甚哉是又直可空一時豪俊之群如

迢迢孤鴻高翔雲際纖芥六合者也故攷其生平日惟  
盟麋鹿侶煙霞以其扼腕當時俛仰太古之懷鳴之歌  
什其志其苦行廉迴有沉湘蹈海之風雖弄翰戲語率  
雋永有思致蓋一皆拔幟于少陵壘中者今其集有擬  
荆軻與醉歌等行可想見也元之壬辰歲崔苻逢蠹起諸  
所過皆墟矣獨天游室巋然煨燼中豈天亦旌之而令  
樹獨者且不能逞耶天游因復號曰傲軒氏憤其丁惡  
造而輕世肆志之意益暴于此矣性少許可獨雅善內  
兄余牧山蓋余亦軼宕為時聞人天游樂與往還每泛  
航清溪弄月佳夜放歌岸嘖譁聲如雷且各持盛氣不  
下故余亦贈天游詩有能酒能詩只兩翁之句愛佳山  
水邑有幕阜屹然一方絕勝之觀也天游嘗攜吟履往  
登之直躋危巔以弔山翁羽客之遺蹟意態超脫似非  
塵寰中人可與白之捫華掌甫之凌岱頂同調今其音  
韻亦多悲壯激烈豈江山助與劍閣後之評固賈乎然  
耶晚歲自矜其徘徊亂世以緬想太平之心卒泯然不  
白也述志賦以寫長飲之恨云後果髣霜未甚皤即癯  
山巖中以死矣名篇珍什流落人間者不識若干罹亂  
離之餘僅存什一逮我明東湖元老葺湖南省志多所  
蒐訪大嘉異天游詩采入之遇真鍾期矣幽貞逸節一  
旦崑然震三楚而聞天下今其支裔日茂皆克承詩書  
之餘澤而不墜於世業益有光云

論曰人事何常大化窮茫吾於傲翁將不益信哉古今  
養高懷竒腴內淵中之士代詵詵也何為竟修名之不  
立高躅之莫羈使之徒韜輝沉馨痕點山谷之光景已  
耶故莘野之夫涓濱之老隆中抱膝之士若隱其身不  
一遇伯樂而觀歐冶也豈不遊閭然無聞乎哉是以豪  
夫志士憤焉長悲擬乾坤為浮萍詫造化為小兒蓋慨  
竒數之無形而痛英雄之疇依也傲翁既已落落於衰  
剝之運矣豈無東海北海之志耶乃卒抱其珍而曾不  
一試不一試亦已矣又并所為文亦忘之不能為完圭  
全璧吐其巉然巖然之鋒以崢嶸宇宙間焉良不可沒  
痛悼哉吾昔嘗哀王仲淹以策千萬乘而不用待清河  
汾志良苦矣終亦不及躬見有奮晉陽之義旅者乃其  
書亦寥寥爾也今吾傲翁豈不酷似之乎使天尚慙遺  
多翁年所則我明聖神崛起以光撲景命猶可及見也  
龍門青田之春遇將不在傲翁耶而翁已矣今雖僅得  
賴其尺寸之耀以想見翁之高於萬一然亦適足以重  
企慕翁者之一長慨矣嗟夫何大鈞之簸弄人使之遺  
憾萬古若是哉

己巳秋九月既望錄于半園之長楚室金保